

四庫全書

集部

欽定四庫全書

集部

山中集卷一至四

詳校官監察御史臣龔騁文

中書臣劉源溥覆勘

總校官知縣臣楊懋珩

校對官主事臣李 燾

謄錄監生臣李 德

欽定四庫全書

山中集卷一

閒適詩共一百七首

初至山中

明 顧璘 撰

楊子疲執戟龐公息巖阿所志既匪同仕隱乃殊科蹇  
余究墳素弱冠挂賢羅一往四十年功鮮憂患多竭來  
返初服城郭困經過倦茲空山曲閒寂患微痾喬松周

金匱四庫全書  
卷一  
四厓嘉穀被前坡鳴禽戲叢篠遊魚泳清波塵氛一以  
遠形神稍相和況有舊田廬偃仰可婆娑疏食苟無恙  
永言憩烟蘿

新理松塢草堂

家世本吳趨明代徙東楚服勤傳素業展轉力田畝逮  
余薄劣資懷筆干斗釜鷄翼希鵬圖搶榆唯自苦眇哉  
竹帛心仰負三聖主解龜返田園荒涼舊茅宇羸軀倦  
城邑衰志慕林數伐木理摧棟荷杵築環堵苟完棲故

書所重守先墓巖嵒倏生姿卉木咸就序流雲暢疎襟  
清風待揮塵但恐尼父譏垂老學農圃

松塢草堂新成雜興十二首

空山卜築敢辭煩城郭逢迎太近喧老病移家唯藥物  
野人乘興自丘樊頻來白鶴如求友舊種青松巧護垣  
已辦鹿車供出入竹林多類辟疆園

野日遲遲陰更晴山人睡起絮袍輕松梢宿露因風墮  
草際浮雲傍水生一壑無多堪獨往百年強半復何營

神仙服食長相誤不及清尊對客傾

山畔堂成祇自憐憑高送目慰餘年江橫木末風帆轉  
寺隱峯西午磬傳野興夤緣雙短屐齋居顛倒一青氊  
嘉賓莫為憂岑寂澗溜圍禽盡管絃

何代新亭動客悲皇都高拱控華夷梁陳割據今誰數  
王謝風流空爾為王氣接連天北極江流襟帶海東涯  
平岡極目烟霄迴鴻鵠冥冥信所之

地近古  
新亭

投簪本意弄斑衣痛哭郊原萬事非玄壤遺封空石馬

白頭殘喘尚荆扉乾坤有恨身同盡五十無聞願已違

細雨山前新草長寸心何以報春暉

堂在先  
墓側

牛峯東南高觸天大石小石西蒼然疎簾對隱鳥皮几  
濁酒閒吟白雪篇六代英雄埋野草一川花柳媚江烟  
無端人世升沈事莫近山翁醉舞邊

衰年多病自宜休避地棲巖事事幽風檻落花催釀酒  
雨窻啼鳥喚梳頭柴桑剝著陶元亮款段何孤馬少游  
野衲村翁俱接近茗盃香篆足淹留

萬峯雲氣入高齋谷口冥冥細雨來  
實喜芳春能潤物  
虛疑殘臘早聞雷  
誰家健犢臨田出  
無數寒鴉繞樹哀  
已約新晴扶杖去  
東風留綻野塘梅

茅廬寂寂倚雙峯  
懶散無心擬卧龍  
階下水流分細澗  
簷前雲宿擁高松  
何顓獨有談禪癖  
阮籍偏於作吏慵  
早識人間行路惡  
肯因書劍悞明農

郭外新移野老家  
舊書猶載兩牛車  
樽空北海虛耽酒  
地薄東陵漫種瓜  
小徑衝門分野竹  
短籬臨水透溪花



優游行樂元無盡落魄浮生詎有涯

五嶽殊方誰竟遊誅茅吾自愛吾丘林巒歷歷羅窻戶  
竹樹蕭蕭擁道周梁燕每驚春夢破野雲能伴醉鄉留  
欲看明月生秋海指點東巖架石樓

手種桃花傍短牆老人殊自愛年芳風晴數蝶穿紅藥  
日出孤鶯轉綠楊飯時兼芝菌味春衣渾帶薜蘿香  
前朝戴墅知何處芳草還生麋鹿塲

舊名戴墅村

# 種柳

桓公居漢南觀樹感搖落而我瀕衰年甫植數枝弱來  
者方無窮何必在身樂

移松

小松擢新莖春雨欣初移從今逮何日始見虬龍姿  
栽棟梁具念此乃知奇

引澗

山澗雨新溢黃流浩縱橫晨興事疏引下匯方池清物  
理各有因匪人曷由成

洗竹

林竹有佳色蔽翳空山阿一為伐榛莽遂露青瑤柯幽  
懷寡相契落日聊行歌

落梅篇

金陵野老棲空山肺病養恬長閉關端居十日阻春雨  
梅花零落溪山間老幹橫煙慘難訴殘英覆地嗟誰數  
蜂黏香粉下蒼苔鳥啄瑤瑤沉黃土城中看花長恨遲  
來時池水含冰澌冷蕊猶封去年雪韶華未動新春枝

準擬入山開病眼一日遶花千百轉釀酒期邀友朋至  
插籬苦避兒童剪丘壑蕭條還自愛榮華飄落那相待  
始知春厭衰病人轉覺天厚雄豪輩君不見五侯七貴  
開名園梅花當春如雪繁和風麗日依期至玉笛銀箏  
對酒喧開時令鼓催青陽飛處仙娥點靚粧花將地主  
相矜盛人助花神剽鬪狂物性隨人異哀樂我心與爾  
甘寂寞且尋世外逍遙遊開落榮枯付冥漠

夜雨

夜雨卧山齋山空百泉響飛嵐度虛樵孤燈爍幽幌餘  
花愁盡落細草忻初長春夢莽纏綿獨繞丘原上

晨起新霽

朝日出松際幽禽語窻間盥櫛事從緩行坐意彌閒方  
沿水新綠曲欄苔舊斑林風會人意遠送孤雲還

復雨

新晴動方起復雨靜更嘉反關向幽室焚香誦楞伽白  
日隱重雲青松坐羣鴉明晦齊一觀嗒爾何咨嗟

對雨

密密春林雨沈沈  
晝日雲陰陽隨氣序膏澤自吾君  
積水鷗鳬下條風草木欣  
殘軀勝耒耜何敢廢耕耘

山迴雷聲近春深節氣殊  
江天雲霧濕林壑畫屏紆  
鳥困投簷戶溪狂掠坐隅  
老夫不出戶無意問泥塗

春睡起何遲茆廚濕未炊  
竹梢歌拂水花片舞過籬  
老病消浮念迂疎冷舊知  
獨憐山郭雨能與靜相期

宗伯嚴公枉駕草堂惠詩因謝

寂寞山人宅能勞長者尋  
烹葵同薄飯刻竹動高吟  
草藉星辰履雲諧鸞鶴心  
寄言泉石畔曾見幾華簪

遣興和三弟舜玉

三月餘寒散緼袍夕陽行藥過東臯  
金花抱雨松枝重紫箨穿雲竹笋高  
遠躡烟霞逃世網細吟風月調朋曹  
春來病骨殊輕健盡日登山未覺勞

幽居和徐禹亮

弱雲橫路颭遊絲春去山花不自知  
門巷草深玄鹿乳

池塘烟暝白鷗饑風鳴竹嶼寒瀟灑日照荷衣翠陸離  
多病邇來人事減深巖高卧復何為

苦癆出息東郊田舍

東莊久不至偃蹇廢田作新桃堪繫馬舊樹已巢鵲兒  
童詫相問黃犬吠頗惡自緣容鬢改敢怪爾輩錯吾生  
知有涯塵鞅苦自縛每云遺冠裳乃復戀城郭瘡瘍非  
我災相邀就林壑心源儵以靜口味日應薄循畦摘嘉  
蔬披草采靈藥患去四體輕塵遠六根脫溪流日洗耳



保此長寂寞

明月入我帷照見牀頭書攬之起坐讀冥心向黃虞君  
王既神聖黎庶儼如愚禮樂少虛文法令頗寬舒民力  
盡耕鑿暇乃事畋漁生無凍饑苦死也何羨餘浩蕩宇  
宙間聚散任所如周公太多事六典過爬梳遂令斯鞅  
輩展轉生蟲蛆燎原日以甚伊誰之過歟

幽居十二詠和魯南

煮茗

為有餘醒在還牽睡思繁汲泉敲石火先試小龍團

焚香

烟生沈水細火宿博山溫鼻觀自相媚無勞矜返魂

洗硯

舊汙滌乃去新美淨乃留清清池水側與爾勤交修

檢書

眼迷四庫籍手倦三絕編願尋索駝傳送此龍鍾年

掃徑

清心唯素月滿意祇蒼苔落葉時相妬那能不掃開

捲幔

每報庭花發煩余捲幔看東風先會意吹搭小闌干

移榻

花開前後圓月照東西簷總為憐花月移牀不自嫌

拭几

游塵彼何物暗我淨几光拂拭誠多勞憎愛各有常

養蒲

芳根惡浮塵纖葉愛澄露它生願化汝濯濯居淨土

灌花

衆芳植庭曲地潤花自饒物情苟相賴可憚抱甕勞

摘蔬

右丞齋露葵拾遺飯蒼葦朱門競肥穰野老獨宜此

種樹

種樹取柔條人言老難待所貴適目前胡為計身外

喜雨東東隣陳叟

草閣平池細點分柴門雜樹亂聲聞游龍倒吸滄江水  
舞鶴低翻紫阜雲田舍病來懷稔歲山瓶喜極判沈醺  
莫欺老手扶犁怯荷策驅牛未讓君

復雨

松林雲氣拂人流茅屋雨聲鳴不休庭潦旋添鵝鴨喜  
稻苗先慰鴈鴻謀疎簾寂靜宜書卷野壑蒼茫憶釣舟  
寄語隣翁多釀酒放歌沈醉送清秋

作亭後丘之上名清曠系之短吟

蓬萊微茫不可求  
匡廬迢遞非易遊  
掌中佳景任攬擷  
不如後園登吾丘  
吾丘清曠招逋風  
謝客妙語遺山翁  
古今樂事留宇內  
天地於我何終窮  
天印蒼蒼鍾陵紫  
左右倒影山杯裏  
白鳥南穿楚岫雲  
片帆東落吳江水  
盧鴻草堂何處開  
陶令柴車日往來  
花間築室搯丹竈  
石底穿池立釣臺  
形勝隨心動生趣  
謳吟觸口皆成句  
無官跡已混樵漁  
有家誓不關婚娶  
高空鵬鷃橫秋日  
近舍流鶯鳴夏木  
但願豐年秫米熟  
山翁爛醉死亦足

午日

五月五日在田舍城郭風光應自新  
燕女綵絲纏蝎尾  
吳兒畫楫鬪龍鱗  
山中祇見榴無色  
病後初知艾有神  
落日一杯桑柘底  
隣翁相對野情真

東郊田舍戲占

北望紫山橫紫烟南窺天印削青天  
柴門古木行荒徑  
柳堰迴溪抱野田  
蕉葉舞牆凡幾處  
藤根縈石自何年  
穿巢鳥鵲初將子  
落簇紅蠶已上綿  
行客賣茶微雨裏

農夫依餉古槐邊身拋歲月何須記地遠塵埃亦自憐  
賣却異書多買犢收將狂性且逃禪申屠即樹成居屋  
陶令逢人餽酒錢雲至剎添閒伴侶花開新得小嬋娟  
眠驚鶴啄彈琴石坐愛魚吞洗墨泉四大有生皆夢幻  
一真無累即清玄所希畏壘庾桑子莫羨丹陽葛稚川

憂旱二首

南國久無雨皇皇六月交池乾魚伏網林熱鳥移巢  
瘧臨祠廟迎龍就澗坳祇愁秋稼盡何以度衡茅



野人遺世慮水旱獨關渠垵鶴鳴何驗江龍飲亦虛疇  
堪一哭禱祀竟何如夜坐看星月臨風益歎歎

松塢答魯南對月見憶之作

良宵愛對空山月赤旱愁侵獨坐人江鶴不將時雨至  
林鳥還帶晚霞新家依百畝心同切地隔孤峯夢亦頻  
野寺相隨又相別人間離合本無因

秋至亭上

關心唯碧樹豁目更蒼岑雨喜蜻蜓出秋驚蟋蟀吟狂

歌穿竹響瘦影照池深豈好逃城市喧囂自不禁

屏山田舍

小溪風露帶漁舡曲塢松杉接草亭夜久野雲橫樹白  
秋高山色過江青長親拙政知農事暫學清齋適性靈  
獨笑吳中狂處士強將身比少微星

食菌

嵇康食石髓安期棗如瓜虛無不可致想像生咨嗟深  
谷隱松桂雨露抽靈芽名齊金光草品異仙掌茶采采

供晨飧色瑩味亦嘉金膏溢齒頰五内生雲霞腥腐一  
以蕩神明發精華吾聞古靈僊餌芝乃升遐從茲謝厚  
味服爾登雲車

中秋山中夜起玩月

中秋萬古月城闕玩每同今年展奇觀對此空山中圓  
魄出東嶺海氣開洪濛長風掃浮翳清輝蕩遙空吳山  
翠千點錯列指顧中澄江動虛影下徹鼉鼉宮天地同  
一色蒼茫浩無窮顧兔露其爪冥冥避高鴻把酒發商

金一八八  
卷一  
歌聲激河漢東古今一瞬息過客猶轉蓬而我寓宇內  
麀  
麀侶微蟲生存不自樂溘死徒忡忡鷄鳴且莫寢坐遲  
初陽紅

山夜

秋氣振庭枝山空響易悲草寒蛩語澁樹老鵲巢危古  
道因書得衰顏賴酒持未忘蟬蛻念真笑虎頭癡

積雨

積雨蓬門客過稀野人吹火爇寒衣未疇乳鴨鳴相亂

柳徑愁鴉坐不飛，抱膝漫吟梁父曲。  
勞心真厭漢陰機，清泉白石從吾好。  
駟馬高車悟昨非。

秋思

露下風高燕鴈斜，秋光平落楚江涯。  
霞綃墮樹飄楓葉，雪浪排溪漲葦花。  
愛酒雖貧多釀黍，避人無事遠移家。  
經旬積雨憐衰病，斷絕門前問字車。

野步

出郭病身健還山，秋日長雲光漏疎。  
木嵐翠集虛堂遠。

害愁防虎全生擬牧羊那知巖壑外隨步有康莊

野興三首

花巖控牛嶺連峰碧嵯峨秀色亘千古我生能幾何行  
游苦難屢築室枕其阿坐卧長對之所獲庶可多朝雲  
結丹綺夕月流金波采之鍊真液永以蠲沈疴

落日滿秋野獨步登平丘山經夜來雨寒泉出溪流緬  
懷古時人開荒廣良疇深山寡人力勞此千歲謀去者  
水長逝存者纖雲浮往來但瞬息百慮徒煎憂不如飲

美酒坐嘯空巖幽

蒼隼摩天飛黃鵠志千里秋空莽寥濶快爾南溟徙浮  
雲東北生風雨颯然至六翮困霑濕吹之墮寒水南山  
松桂陰西疇稻梁美萬事難預期不如早棲止

夜坐

白露中夜寒蟋蟀鳴牀下簌簌葛衣裳慘淡謝炎夏閨  
人戒機杼田畯課場稼睠此歲載陰蹇予日多暇朱顏  
黯以蒼短髮不盈把商戰詎能肥遽年未知化兀兀迷

陳編何以酬夙夜

隣叟見過

場雀驚且飛籬犬隔樹嗥開門見田父餉我攜濁醪寒  
暄甫及席首陳入城勞繼云太廟災策免數大僚京兆  
歲大比薦拔多英豪請君望泰階清平在崇朝聞言謝  
田父野語胡大謬我袖恨不長無以掩君口進退國大  
政柄在相與后揮霍如雲雷小民但奔走爾我服稼穡  
所憂唯百畝出位而妄言它人恐相詬山厨蒸蒸熟與



君酌君酒明月生東山  
移牀就衰柳

幽懷二首

文章經緯業制作貴有程  
六籍出元聖道奧非華英  
自從刪述來爾雅存西京  
馬遷綴古史筆力驅滄溟  
蘇李起介冑詩辭靄和平  
今觀宇宙間日月垂天明  
小儒競綺麗瑣屑如繁星  
吾衰志未泯願締諸賢盟  
揚雄強模擬何啻蒼蠅聲

昌黎文章伯後代罕儔匹  
李杜雖云雄氣格差甲乙  
奈

何賦長篇退讓如自失想像巨刃揚魂魄生戰慄乃知  
作者苦窮探極幽密譬對百戰場動靜慎師律守正兼  
設奇變化貴神出左車井陘謀淮陰幾見絀多畏乃勝  
人名家有深術

散步

理生就田疇辭喧出閭里自歎乏高風時歸念妻子棲  
鴉迷夕嵐浮鴈唳寒水散步數羣峯日從天闕始

中秋對月和羅女文

高秋明月滿天涼  
露坐風生薜荔裳  
蟋蟀近牀還獨語  
蟾蜍離海已深藏  
人間忽敞清虛府  
地上平鋪雪霰光  
笑玩素娥敲藥杵  
不勞銀漢問舟航

雨後漫興東羅女文

春花落盡垂楊低  
竹林鳴鳩相應啼  
夜來久旱得微雨  
門前細草青萋萋  
飲虹橋頭西日落  
橋下水光搖草閣  
莫嫌野客杖藜來  
淪茗攤書殊不惡

東野

天印山如天，斲方秦淮水。縈練帶長夜，坐船頭看明月。  
垂虹斜掛幾飛梁。

東山茅屋野人家，謝傅薔薇春著花。入市懶騎從事馬，  
開園時種故侯瓜。

新涼夜坐次彥明二首

獨鶴夜何事，松頭棲復遷。樹涼占老態，木熟受豐年。細  
竹枝裊明星箇，箇懸年來知物化，無意更求仙。

殘暑金風改，中宵白露寒。秋期來朔鴈，野服罷齊紈。蛩

響喧陰壁螢光點石欄荷衰葉更起留伴蓼花看

八月四日熱

八月江南毒熱新火雲鬱鬱尚蒸人井梧葉落太傷早  
庭戶蚊喧難及晨不見金天流素月思霑玉露洗黃塵  
重尋篋笥開紈扇始笑西風誤認真

許彥明過荒齋看菊

寂寂柴桑宅黃花但滿園相將秋意晚無奈曉霜繁珍  
重殊方種艱危隔歲根玩來終澹泊莫向美人言

雪中承劉司馬許顧二司徒見過

北風吹雪擁籬根，高駕翩翩午扣門。  
倒屣自憐庭戶濕，圍爐同待酒瓶溫。  
江山積素看松翠，閭井占年喜麥蕃。  
茆舍蕭條虛盛賞，殷勤燒燭伴黃昏。

憲府王公載卿命酒期過草堂阻雪不至奉簡一

首

不誦清詩三十年，晚城佳會又虛傳。  
書來送酒春生戶，興盡迴舟雪滿天。  
獨向瓊枝勞悵望，非干霜簡絕攀緣。

江梅近暖參差發還擬乘驄野水邊

和陳魯南遂初齋漫興

投老書千卷棲真屋數楹放形依鳥宿仰面看雲行雪  
棹誰乘興風瓢莫弄聲歸來追往事無味是浮名

除夕二首和女丈魯南

時序驚心獨倚欄敝裘猶耐故年寒餽饒餉節鄉風舊  
秫米逢秋酒債寬萱葉向陽鋪砌綠茶花衝雪透林丹  
青山已結登臨約且喜籃輿老更安

條風中夜轉東方醉戀殘年更舉觴白髮空添壽者相  
朱衣曾玷大夫行貪聞雪壘遺蝗隕愛見春林舊柳長  
閭里高人多典則追隨何忝鄭公鄉

除夕

桃茆驅讎畫華門椒花頌壽瀉芳樽生涯喜傍農夫老  
社會慙登大父尊長有蟬螯持左手更添鶯舌弄前軒  
天時代謝非吾事莫為增年意轉煩

和徐子仁除夕



蓬鬢休嗟老不堪餘生都已付沈酣身旋蛙井元無幾  
歲歷龍飛又十三江草向人寒更綠塞鴻何事早辭南  
年來結念投禪寂且喜維摩屢放叅

和舜玉春日偶題

小園泉石占清華竹塢松堂靜不譁懸薄護寒藏橘實  
曲池鰣水灌蘭芽緇衣老衲時求飯紗帽幽人共煮茶  
門外東風搖五柳居隣閒擬似陶家

和魯南元夜雪

雪飛元夜玉盈除  
燈射玻璃燭影虛  
林借月華疑宿鳥  
池添冰力困遊魚  
春愁正賴寒欺酒  
老眼空勞夜照書  
火樹銀花交映地  
留歡休問五更初

雪夜觀燈和彥明二首

春夜邀賓景物宜  
雪華燈燄兩爭奇  
鶴翻玉羽迷僊駕  
龍吐驪珠照酒池  
樂劇不辭金管譟  
坐寒頻喚畫屏移  
祇緣郢曲高難和  
豈是東君賞興疲

雪花凝素照虛臺  
薄暮誰披鶴氅來  
酒熟似邀燈節至

梅開應被笛聲催  
臨觴幸免當官累  
投轄慙非勸客才  
莫笑田家無所獻  
火輪冰柱亦詩材

和魯南新春

白雪釀寒仍送臘  
紅燈窺暖巧偷春  
神君綵仗鞭牛早  
遊女羅襦綴燕新  
泉石投交忘主客  
齒牙垂老厭酸辛  
閒門舊友皆星散  
唯有陳雷晚更親

閒居四首

太湖之石紫崔嵬  
溪上茅齋對爾開  
指點庭心分泰華

依稀巖背宿風雷雙飛鵲闌穿晴樹百轉虫書印古苔  
明月不知吾懶散夜深來照讀書臺

黃閣朱樓槩太清江山襟帶舊神京開園更擬閒居賦  
近市非干大隱名聊養孤豚供菽水尚勞羣雀戀柴荆  
薰爐藥竈真餘物合併狂夫過此生

城郭秋陰襲苧袍林園稀到長蓬蒿蠅蛸傍樹生羅網  
野鶴臨池惜羽毛年長漸驚朋輩少形枯真悔簿書勞  
追歡未斷清尊酒左手猶堪擘蟹螯

種柳今春拂地垂黃鸝來挂最長絲高城過水銜青嶂  
古樹搖花照綠池猿鶴忘機堪結侶馬牛多病枉逢時  
揚雄錯指玄經好覆瓿他年總莫知

答許彥明見夢二首

浪跡唯方外勞生總夢中  
遠公開淨社玄度有高風  
塵世閒難得禪機病易通  
所希情性合何必往來同  
禪宮元寂靜况復雨連陰  
座有僧同飯門無客見臨  
妙香團狹室遠磬落高林  
誰信城中夢超然契此心

和陳太僕生辰二首璘與太僕及惕菴總憲公同

生時惕菴亡矣

天當流火生同日人羨乘車貴一時忍望列星悲傳說  
愧顰衰貌對西施山中學道丹誰授花底聞歌酒莫辭  
敢謂風雲隨變化願從泉石盡交期

秋來卧病懷山閣老去逢生怯酒尊拙政幸能追騎省  
遠游初免怨王孫亭亭野鶴閒過砌寂寂雲峰對掩門  
點檢交知還自惜白頭今見幾人存

雪中和王存約刑侍五首

杪歲呈三白農談喜及時  
麥傳全稔信松挺後凋枝  
海凍愁龍伯沙寒泣鴈兒  
唯有袁安舍高眠竟不知

積素明幽館為祥表  
盛時風迴先帶霰氣煖不封枝  
被鶴無高士懸鶉有凍兒  
君王憂四海多少自應知

天地雲同色江山皓一時  
梅狂花覆野柳困絮黏枝  
魚蟄堅冰壑鴉迷返哺兒  
侯門炙朱火寒透不曾知

璚樓無盡地玉樹不移時  
地脉消氛侵園容發故枝  
裘

輕飛獵騎酒碧賦歌兒灞涘許情好惟應野客知

南國窮陰候東樓獨坐時興牽孤棹水情遠野梅枝愛  
酒閒中聖慵書卧遣兒衰年疎懶意還賴故人知

春夜飲女文宅大醉翌日病眩負黃懷李之約詩  
以識過

東橋老人田野客一生愛酒腸腹窄春來忽到羅含家  
銀甕盈盈搖琥珀傾壺便飲不須勸連舉兕觥過累百  
據案狂歌驚四隣但笑諸公太拘迫玉山歆仄夜方歸



不寐坐倚平泉石天明始覺中聖人眼光錯莫亂朱碧  
地如車輪忽旋轉欲立還驚足盤踞黃公臨壚復召我  
安得奮飛生羽翮乃思旨酒古有戒人生樂極終何益  
元夜奉諸公飲瞻辰草堂

老去風情異少年元宵留客紙燈前清筵素月宜觴咏  
繡陌香塵隔管絃火樹遠飄煙靄處星河斜挂雪晴天  
更闌不醉休辭去回首歡娛易惘然

山庄即事和周子庚

十年無夢到東周  
坦腹高眠杜若洲  
狂吐肺腸投甕盎  
老持骸骨付菟裘  
當樓月上山回晝  
接吟風鳴麥弄秋  
笑坐胡牀歌散調  
不須吹笛也風流

漫吟

萬事浮雲莫問天  
髮毛元解記流年  
春秋按節投花種  
兒女分畦理芋田  
闢地多方求怪石  
買山初意為流泉  
城闌自古稱佳麗  
獨笑先生野性偏

柴門

翠蓋平遮松栢林畫屏分映兩青岑坐收秔稻三秋色  
行踏垂楊一徑陰雨突烟沈人卧穩風簾花落燕巢深  
幸無奇字藏書篋不惹輜軒使者尋

九日亭上獨酌六弟送盤殮至有懷

九日山亭獨舉杯盤殮遠送白衣來乾坤大夢堪高枕  
林壑衰年切孔懷近水脊令還自得傍厓黃菊未全開  
茱萸且莫迎霜落後至還期挿帽回

九日喜何叔皮至山莊

山館際佳節川原秋氣澄  
白日照禾黍頗適幽居情  
曳杖登高丘停車延友生  
契濶良已展懽悰亦交傾  
濁酒寫情懷三爵匪充盈  
古處道所貴澆漓安可徵  
風淒碧草變露濕黃花榮  
感茲特物改勗爾沒齒盟

夜觀陳鳴野畫草堂壁作歌謝之

草堂素壁燭影孤照君夜作山水圖  
墨華如雲生手底高聳山嶽卑  
江湖連林老樹根株古蛟龍盤拏撐爪股  
顛厓忽挂飛蘿莖長繩繫日垂青冥  
天台石梁宛在眼

武夷幔亭亦非遠桃源可覓秦人家竹林似近梁王苑  
愛君胃次多崛奇靈區勝概任爾移荒村每恨少疊嶂  
草堂特地生幽姿猿驚隱隱號清夜麋鹿依稀走階下  
只恐城中好事知天明戶外喧車馬我有窮愁愁不醒  
感君遺我夫容城年年釀酒三千斛閉門獨醉雲中行  
望雪懷陳鳴野二首

野雪清如許高人不見留誰家金帳酒能及剡溪舟羣  
木瑤華積千山素影流幽懷狂不定孤嘯一登樓

風急雪紛紛樓高野望分  
霏霏過樹遠片片灑窻聞  
林凍玄猿哭雲迷白鶴羣  
正思陶隱士漉酒共清醺

飲女文宅冒雪夜歸

醉後那知雪片稠  
瑤花千點集貂裘  
清吟乍別梁園宴  
豪興能欺剡曲舟  
素羽風前迷鷺渚  
玉鱗雲外見龍樓  
顛狂欲上城西閣  
坐玩寒江練影流

閏十二月三日蒸燠其夜迅雷大雨同魯南紀變  
一首

季冬閏月忽暄燠驚見蚊蚋當戶飛自緣雷雨好解作  
誰道陰陽難範圍四時呂覽有定令五事箕疇無少違  
為檢金縢看故事分明人道應天機

元夜樓望

夜閣臨衢倚醉凭江南佳麗尚堪稱春光竟惜千門月  
節序仍誇九市燈香霧橫街人似錦歌鐘何處酒如澠  
長吟秉燭星橋曙猶記狂夫少日曾

山中集卷一



欽定四庫全書

山中集卷二

明 顧璘 撰

遊覽詩共八十四首

登太崗慈善寺

野寺冠山椒溪門下弘敞荒蹊緣澗入危磴躡雲上松  
花風際飄麥苗雨中長高樹倚巖生特立氣森爽何年  
劫火餘紺殿滅銀榜徒聞佛道尊胡乃失龍象悠然憩

前軒雲峯矗相向下有良田疇平視如指掌春鶯流遠  
音脩竹愜幽賞何必五臺山始可資靜養斜陽且歸去  
暇日期再往

宿祝釐寺晚浴

山居少塵事行吟步高春連林不知遠倏度雲間峯寺  
門幽逕熟婉孌撫長松禪老款虛室情親色彌恭玄論  
燼華燭疏食臨暮鐘浴我清淨水形骸緬沖融虛襟釋  
滯念真炁生靈宮蒲團結跣趺宛坐青夫容就枕忽成

寐夢覺忘所從天明返蓬戶日出山烟濃

游丘常侍山園二首

山蟠大野翠堪憐樹老深巖忘歲年畫閣地清臨水見  
紫泉聲遠隔花傳前林別墅通三徑暇日禪床借半氊  
叨際聖明空懶散狂歌時復和薰絃

采芝深谷賦歸休幸有隣莊水竹幽畫障日開山九疊  
素封秋倚橘千頭長懸片月延僧住滿放閑雲伴客游  
桐葉已齊春去久翻堦紅藥為誰留

與陳大魯南遊天寧寺二首

野寺青霄畔，攀厓扣法堂。  
山鋪平野濶，江繞大都長。  
鑿石開花塢，梯雲架竹房。  
城中車馬客，誰解就荒涼。  
峻嶺香臺峭，高林夏氣清。  
山分龍阜色，澗別虎溪名。  
野酌臨歸鳥，昏鐘吼卧鯨。  
坐依雲霧窟，那有市朝情。

同魯南祝禧寺結夏八首

酷暑欺吾病，空林共爾尋。  
雲高羣木爽，日落半巖陰。  
散髮忘賓禮，清心悅梵音。  
坐依禪榻畔，幽思自蕭森。

斷酒狂全減拋書懶更成山深人事息僧老道心平坐  
石分松影橫琴理澗聲夜涼清不寐披草月中行

身住清涼界那知有鬱蒸蒲纖梳翠髮瓜冷嚼紅冰病  
退生為我家忘味近僧老禪麾塵尾時見落青蠅

愛爾山中靜猶憎蟬噪繁松杉氣無暑賓主坐忘言翰  
墨陶真性瓜蔬點薄飧悠然泉石味難向貴人論

翻經非有願擊磬果何心偶爾依蓮社翛然近竹林松  
風餘萬頃蘿月抵千金莫買深山隱禪關日可尋

金堂虛隱霧石壁凍含霜坐久收葵扇吟多問豆漿虎  
眠渾不猛鶴舞暫為狂滿目無塵事虛襟亦自涼

祇園不盡景留客易經時野竹團寒翠池蓮散素姿茶  
香修夜供杞菊訂秋期吾已嗔吾擾無勞大衆知

淨社難求友高人合在山泉甘出石井樹老映蒼顏暑  
月誰偏爽勞生今始閒秋風何日至疊巘擬重攀

同諸客雨後登牛山絕頂

晴巖臨晚照懸磴躡秋空地勝羣賢集天清四望通猱

升攀仄石驚嘯激悲風獨仰皇居近彤雲護紫宮

登牛首兩厓顛

雙闕峙天表巨鼇戴雲浮秋空氣先爽預愜登高遊攀  
緣千仞起曲折百盤周蒼林忽在下手挹河漢流纍纍  
揔機石荒池飲牽牛崢嶸羅衆山俯視但微丘北瞻黃  
金闕五城十二樓高帝聖圖遠設險開皇州鼎湖不可  
望蒼梧雲影愁長江渺一髮孰與吾乘桴舒嘯振鈴閣  
諸天風颼颼落日下西嶺慘愴增人憂

登華巖

花巖久不至脩竹倏滿嶺息駕大觀堂塵目快秋騁短  
衣陟中峯仄見西日影天低鵬鷃近雲重松杉冷列嶂  
難為雄長江不知永牛山亦下對樓觀綴佳景莊嚴侈  
象教喧卑薄人境捫蘿步兢兢憩石心耿耿宅生果無  
因茲遊固何幸風林忽暮鐘謖謖動深省

祖堂寺逢海天僧

古融始入道開山此為家疏泉策兩虎啗洞驅神蛇天



龍作人象獻供持巖花一聞真空詮振錫却諸邪跏趺  
了無事竟乘大牛車影堂燈悠悠白日長西斜幽尋入  
山麓庭宇忻靜嘉門深蔽古樹澗冷生青霞柿實寒少  
葉桂枝蠹仍華老僧餘道氣款語談楞伽自言非中孚  
請餽仙掌茶相送過溪別歸路喧昏鴉

寧海寺訪達公不遇

禪龕寄林杪信是高僧居蒲團間陶鉢不置貝葉書幻  
火惱維摩飯蔬長晏如誅茅輯佛宇鑿地延僧廬有金

盡布地隻衲不留餘入林拾橡子一室但空虛侍者守  
松院迎余駐柴車焚香設清供道念為之舒朱門厭腥  
腐駟馬馳雙旗豈不羨榮貴反側多憂虞頽年向短促  
薄俗背迂疎永願結蓮社優游度桑榆

弘濟寺江閣

北山高無極江水下浚深飛閣嵌虛無宛挂垂蘿陰危  
柱褭相挂櫺軒控千尋游目信絕奇躡足懼弗任旁臨  
得平坂雲水際蕭森參差羅高木傾仄懸靈岑洪波動

其前浩渺空人心勞歌不自慰濁酒時一斟天長去鳥  
沒日落清猿吟欲止神悚惕踟躕下空林

燕子磯

名山意自勝臨水趣轉幽况茲燕磯秀復枕澄江流孤  
根託何所上抱雲中樓空冥瞰水府下見鼉鼉遊衝濤  
蕩危石翻恐地軸浮元氣旋混茫長風吹不休西來疊  
浪色發自岷峨陬香靄衆山影依微行客舟徙倚白日  
暮極目令人愁

關祠

漢季昔鼎沸孫曹竊王疆帝胄擁劔門龍虎爭奮張桓  
桓萬人敵東盼無荆襄運移見傾覆孰云謀匪臧生為  
吳國仇死食吳人鄉烈氣橫四海遺靈戴今王江邊廟  
門古松栢寒蒼蒼英爽如有臨風起旌旗翔君看祠前  
水萬古東流長

崇化寺梅泉

昔游巖中寺梅花覆寒泉不到三十載梅摧祇空巖陵

谷幸無改豈嗟浮物遷清源出細竇淺草涵微涓山僧  
誦經處獨有龍蜿蜒沖襟靜相照塵鞅忽已捐漱齒叙  
幽事洗鉢修淨緣古殿夕陰起蒼林生遠煙佳興不可  
盡延佇情悠然

嘉善寺觀石壁

蒼石斲蒼雲誰遺空山裏藤蘿覆細路披烟得奇詭巉  
巖負龍脊崿岈露鰐齒脩竹照人青幽花傍泉紫樹古  
走危根欲斷不可止金陵百名勝無地可勝此老禪墮

貪癡秘匿胡乃爾天地終劫灰況我二三子取笏端下  
拜託交自今始

幕府山望江

昨夢江上遊巨浪動枕前今登山頭望江色轉可憐青  
峯幾千仞倒卧中流天人聲落浦溆樹杪浮行舡物理  
反相媚樂意良已偏因尋達磨室仰叩西來禪面壁恐  
心死渡蘆事亦顛不如結同好嘯咏攀雲烟一醉更一  
醒明日還復然

顧氏北麓草堂

谷口花冥冥井上梧桐清山人築巖戶避俗兼逃名種  
黍牛犢長養蠶桑柘成野外無別儲濁酒貯甕罌上以  
奉墳墓下以延友生客來款茆簷山大了不驚大兒富  
丈史楚楚解將迎藥院共游行松林屢經行三宿竟忘  
返屐齒緬已平乃知隱淪者祇在王都城

登茅山三峯四首

上界靈宮懸碧落層巒飛步躡彤霞塵身乍禮金銀闕

天路疑逢龍虎車三洞南盤通海嶠五雲西拱見京華  
清游勝覽懼無極却歎人間日易斜

迢遞三峯得峻躋到宮唯見衆山低天池水碧蒼龍伏  
巖樹風高白鵠棲雲際瑤壇開日月林間丹井隱虹霓  
仙人只在華陽境松葉桃花咫尺迷

頭白遊山恨已遲遍尋靈跡慰幽期雲根變幻陰晴石  
海眼潛通霹靂池絕壁傳觴臨過鳥深林炊黍茹生芝  
跼蹐陵谷傷今古不見前朝宰相碑



東南佳氣擁三山，臺殿參差指顧間。  
福地巖巒天下勝，神君笙鶴夜深還。  
林銜落照秋仍麗，人對寒雲意轉閒。  
晚下前峯明月起，更臨幽澗弄潺湲。

龍池

蛟龍宅大海，山椒非所藏。  
吾疑蠃蚌種，野語誰張皇。  
禱祠興雲雷，歷代紀禎祥。  
神物變乃爾，化理焉能詳。

喜客泉

嘉客入門笑，靈泉應之翻。  
豈因孟嘗死，化此山中魂。  
迸

珠疑貫縷羅星或按垣喜余果何事欲叩竟無言

華陽洞

穹厓積鐵古下嵌仙人宮流觀洞天記渺與林屋通把  
火驚石燕吹簫動潭龍微茫失歸路返照秋林紅

巧石

三茆真神臯靈槩萃茲谷怪石非一狀蛟虎爭起伏苔  
花爛如繡藤根走相束殘醉吾未醒曲肱枕雲宿

左紐栢

仙翁鍊金鼎化自秦漢前祠樹歲月古霜皮相糾纏道  
家騁神怪謾語誣人天吾嗔雷君忍一火無留煙

隱居墓

薄俗昧上善高賢葆清真圖牛憚為犧古墓今猶珍松  
風有餘聽草露無長春徒使輕舉士依稀慕芳塵

曲林歌贈曹君時範十首

華陽隱居空舊名曲林精舍築新成山頭一片青蒼石  
領畧高人萬古情

大茅峯頭多白雲誰能持取贈東君  
高車駟馬當年事  
海思霞情後代聞

靈蹤古蹟蓋江南中館居中日可探  
雲洞斜封埋壁地  
石峯高插積金菴

楚王澗前秋水生泠泠遶舍玉琴鳴  
道人獨愛林中靜  
瀉向圓池一鏡平

山腰石樓風露新桂枝蕉葉拂遊塵  
幸無七貴傾高蓋  
長禮三峯作大賓

元符宮連秋樹林烟巒霧壁晝陰陰芝潭對飲斑文鹿  
竹塢孤飛雪色禽

凋盡山中宰相松長風無地吼蛟龍曹公種子蒼髯老  
更引寒濤響後峯

匡廬江濤不可經武夷南天空自青何似三茅近京國  
纏聯王氣會仙靈

曲林主人蹤跡奇前身陶公安可知脩殿靈官投化主  
朝山香客拜生祠

方瞳墨髮地行仙誰信山翁七十年興劇夜游輕猛虎  
身輕朝陟俯飛鳶

茅山步虛詞

太儀拓洪宇靈山開福庭洞天竅華陽地肺浮金陵展  
公始羽化茅君遂遐升王老發玄旨上元授真經乘風  
出埃壘餐霞謝羶腥三真登虛府九錫冠仙卿百神鎮  
侍衛八極恣游行金堂日星耀玉洞煙雲冥天地咸得  
一萬古歌清寧

還家同金士希諸君游牛首

金陵山水四方聞，天闕嵯峨更不羣。  
臺殿散臨雲外起，岡巒遙向日邊分。  
幽人興發清虛界，正月春生錦繡文。  
莫怪還家先到此，他鄉魂夢每殷勤。

早秋過斌公山房和許彥明三首

鐘磬花臺寂，雲霞松塢深。  
石林秋不熱，水國畫多陰。  
結東非吾意，逍遙近佛心。  
莫言追往昔，聊喜悟來今。

青嶂白雲蒸，高臺野客登。  
鳥迷方外路，雲護定中僧。  
對

酒狂何在翻經老尚能摩挲巖下石坐語記吾曾  
濟勝無強足幽尋亦據梧僧門遠市井秋色澹菰蒲定  
息看香篆逃禪托酒壺浮名百年崇遣盡莫重沾

永興寺結夏

濯髮蓮花水清風滿面吹松高迎日早僧老下牀遲施  
食鳥頻至翻經鶴靜窺物情渾不遠幽興自相宜

九日同太宰嚴公城西汎舟二首

九日江門蘆荻秋登高何似汎蘭舟城臨曲水天河轉



地接仙臺苑樹浮佳節壺觴隨酩酊上公軒蓋倍風流  
迂疎獨笑陶彭澤漫插茱萸亦滿頭

蘭橈東蕩曙煙開菊萼西衝落照迴夾岸山嵐飄几席  
遶城波色動樓臺都人節序遺風舊詞客秋吟發興哀  
偃仰皇州多勝槩揮毫何以繼仙才

同陳魯南雨飲永寧寺

南山飛雨滴殘卮野寺鳴鐘客散遲醉眼耐薰紅杏色  
韶華催換綠楊絲衰年感舊重重恨故苑尋春步步宜

擬上花臺觀淑景濕雲橫路正低垂

次趙克用游靈谷三首

禪宮寄在萬松深紺殿陰陰入紫岑古碣長留開士影  
頽廊堪惜畫師心嗟余卧病虛春色愛爾清齋聽梵音  
石室乘涼十年事詩成幽興轉難禁

入山飛翠滿衣襟一逕松蘿曲塢深龍寢雲高橫玉氣  
鶴林風定淨禪心開堂為有真僧出避地應無俗累侵  
響石靈泉多勝跡與君扶杖細相尋

紫厓蒼巘隱雲房春盡唯聞藥草香風磴噴泉晴欲雨  
石林含露午生涼醉憐半落花辭樹坐歎西飛日轉廊  
回首碧城燈火亂淡煙疎柳路微茫

同魯南宿天界竹居

白首同歸桑梓日舊游山水得重過聊依僧飯炊菰米  
更理漁蓑綴薜蘿花老不知春事盡竹深偏愛雨聲多  
旁人莫訝追歡劇歲月翩翩奈爾何

同魯南天界方丈對雨

與子避俗祇園深高閣雨鳴如洗心芳草杜門無馬跡  
墨雲纏樹有龍吟堪憐把筆臨池水況復銜盃對竹林  
終歲驅馳城郭裏幸於支遁此開襟

祝禧寺羣公游集二首

桐館延高駕霞門集繡裳山深寒隱日松老翠含霜共  
洽壺觴興仍探翰墨場臨風意披豁飛鏑試穿楊  
舊國開今代新亭異昔遊江山銜日轉宮闕抱雲浮勝  
賞羣公得高情百世留蹇余丘壑陋觴咏托名流

和徐子仁游虎丘四首

勝地遙相引清川澹自臨散懷盤石大洗耳劍池深僧  
氣饒雲月巖居傍竹林坐來神易愴松籟莫哀吟

溪門藏曲隍入寺始知奇石悟生公法山傳白傅詩浮  
雲催短世袒褐傲清時蓮社容吾酒終當共爾期

漫踏書臺路那逢講席人泉爭惠山品地避子城塵幽  
林雲隱見峭壁玉嶙峋本性宜巖穴勞生負此身

詩書負自得雲水老何厭世味僧邊減山容雪後添狂

摩試劒石醉眺大吳巖莫笑歸期緩名藍客易淹

夕陽同王禮部陳太僕過東山僧房

落日過山寺懷賢傷古今謝公去已久淶水歌聲沈雲  
壑延高駕風林淨夏襟傾杯莫愁晚明月在東岑

和魯南永福禪房二首

支公本是禪林秀更愛祇園在近鄉問柳尋花唯竹杖  
解衣支枕有山堂雲浮世界知空寂雪滿頭顱歎老蒼  
聞說菴摩羅結果燈前攀取一開嘗

山人每為看山出，唯有山雲不待期。  
草長乍經春雨後，江明偏近夕陽時。  
前林犬吠僧歸遠，古殿鐘鳴客散遲。  
除却陶潛貪酒盞，不知蓮社復容誰。

秋日尋城東諸山，頗歷深險，得詩八首。

秋日端居愁不眠，出門騎馬踏蒼烟。  
衣霑濕翠經崖崿，耳灑寒聲接澗泉。  
夢到桃源詢往代，疑逢石髓見靈僊。  
金陵豈獨稱佳麗，咫尺名山是洞天。

馬首遙隨碧澗東，人家多住白雲中。  
龍泉沸處還生虹。

虎洞腥來自起風向子正當婚嫁畢阮生休歎路途窮  
曾聞天漢支機石肯信高巖不可通

紫山東轉接江門萬壑千峯擁孝園遠結雲霞連海島  
迴瞻日月蔽崑崙牽蘿步入巖間寺選樹來傾石上尊  
猿嘯正堪淹白晝鴉棲渾已報黃昏

鼎邑元當萬方會橋山今集百靈朝宮城抱日雲常繞  
陵樹擎霜葉後凋衰晚空林從坐卧太平深谷有歌謠  
此中合共漁樵老叢桂淮南莫更招



盤空石路草纖纖白鶴仙人尚有巖松偃即披雲作蓋  
瀑飛還掛水為簾采芝綺夏何須出食薇夷齊亦太廉  
種黍滿田長釀酒棲遲何歎歲年淹

六代干戈龍戰殘青山依舊繞江干石麟不省玄堂改  
漆閣徒傷翠栢寒庾信歸來空有賦陶弘老去竟何官  
飛鴻欲避林間犬萬里冥冥振羽翰

官路橋東錦石峯平原開出玉芙蓉高標雲霧天中積  
遠勢波濤水上重喜近魚梁堪把釣擬修丹室預栽松

紫苔蒼蘚饒秋色埋骨它年賴爾封

竹杖逶迤躡紫霞羊腸山徑莽橫斜林深更隱彭城館  
寺古猶傳謝尚家陰洞閉雲飛石燕寒藤懸樹墮風花  
周顒去後移文在此地何人領物華

冬日同諸公飲憑虛閣

寺閣吟詩臘月中擁裘行酒氣彌雄江山過雪生新色  
天地凝寒渺太空獨去鷹鷂迷落日後凋松柏倚高風  
須知霜月光偏勝莫道冰林賞易窮

卜得彭城樂丘漫賦用魯南韻

買山初費賣文錢  
預卜新丘古澗前  
舊日高人招隱地  
此生逆旅待終年  
烟霞寄傲深成癖  
去住忘情澹入禪  
白髮光陰知幾許  
紫泉丹壑且黃緣

雪後歸自南郭

雪後帝京聊騁望  
冰天懸影照人寰  
遙瞻丹鳳分銀闕  
周覽青龍展玉山  
廣野漫鋪明月色  
白波搖動大江灣  
多情獨倚新亭樹  
更愛長風灑醉顏

祝禧寺望積雪

巖谷素華積禪房朝倚闌為憐珠樹麗宛坐雪山寒  
白以空為色冰因凍作乾太陽休見恐生滅本同觀

山中集卷二

欽定四庫全書

山中集卷三

明 顧璘 撰

贈荅詩共一百八首

陳魯南學士自山東寄遁志十絕和之

門接登山徑窻臨洗藥泉  
草堂幽意足況復近皇川  
眺迴蒼茫外探奇紫翠中  
忘機同海鳥脫跡比雲鴻  
清玄非晉代巖壑勝山陰  
羣從差強意時來醉竹林

攜樽登樹飲抱被枕流眠本性疎狂甚非關慕昔賢  
真閒聊野服至樂止人寰肯為神仙誤虛尋度索山  
新亭高處望今代異風雲紫殿開京觀龍成五采文  
星散南山寺乘春取次登封筒來往數隨處得詩僧  
牛峯懸殿閣對削獻花巖感慨千年杏摩挲十丈杉  
江動新林浦天垂大石峯四圍山萬點雲海濯夫容  
舊路石岡僻新堂松塢深春風猿鶴侶扶杖遠相尋  
寄荅陳大藩叅二首

官重今方伯，旬宣事獨賢。  
情飄五湖外，詩出萬人傳。  
玉署虛仙籍，春江夢釣船。  
祇愁鳬舄影，難離紫宸天。  
卧病春山裏，勞君省閣思。  
衰顏丹鼎笑，晚計白鷗知。  
應接才仍拙，漁樵興頗宜。  
萬緣空欲盡，猶自未忘詩。

貽霽僧

埋頭不振蒼龍錫，合眼猶持白馬經。  
門外任教雙轂轉，堂中長對一燈青。

贈金山僧圓濟

山僧扣我門秀發金山骨相見了無言空庭踏秋月

送斌上人游杭州

有序

上人禪業清淨解楞嚴法華妙義余與石亭陳  
公時往談說輒移日不倦今晨挑包荷錫來扣  
山居云將東游吳越訪諸名山叅大知識以證  
圓覺請余作偈導之余不善偈為贈一詩因憶  
杭州郎沈諸君陶謝流亞也往開蓮社暢塵外  
之風不愈於縛禪寂乎爾行矣請擇於斯二者



斌公禪林秀前身海潭龍明珠濯清水本性長玲瓏少  
事大虛老空門初發蒙拜趨陳莊座金篦刮雙瞳低心  
達磨壁捧鉢曹溪宗天界大叢林跣趺坐堂中頭陀滿  
四座發難如扣鐘吾衰謝抖擻卧疾維摩宮與子強荅  
問而豈明真空支許方外交聊以息微躬今晨告余別  
遊方海之東禮佛普陀島叅禪雪竇峯青蓮被寒泊白  
月懸秋穹行色有佳景歸雲無定蹤我有振衣地寄在  
杭萬松浩渺湖海接逶迤巖壑重爾往結蓮社陶謝將

無同長謠寫心曲託寄東林風

分題得秦淮壽龍致仁

秦人鑿淮古城磧秦時流水今如昔地下黃金空自深  
天門紫氣逾輝赫六代煙華漲錦雲龍江鷺渚澄青碧  
形勝今開天子都風流更隱幽人宅幽人抱藝入承明  
能使四海傳高名翻然解組歸淮水笑弄漁舟自濯纓  
聞道舍傍葛仙井的爍丹砂徹夜明與君共泥紫金鼎  
手把霓旌遊太清

壽姚孟恭七十

脩竹老翁何所求  
紫芝歌動傲王侯  
逃名豈羨金門貴  
學禮仍看玉樹稠  
大道長生唯藥鼎  
清談終日有茶甌  
堪誇世範傳儒素  
已許鄉評占勝流

壽易太守士美

清修鄉國老文儒  
後輩蹒跚總不如  
黃霸有才聊試郡  
伏生從少已傳書  
高才晚剖荆山玉  
美政新還合浦珠  
林壑光陰方灑落  
莫教門外候安車

答汪中丞見懷

雅望同歸天下賢  
知心初附白頭年  
擬將東海論交誼  
幾向西湖費酒錢  
石澗行臨三竺水  
茅亭吟對萬松天  
相望千里能相憶  
滿紙高情護碧煙

送林伯章

金陵帝城天下會  
名勝從前特稱最  
觀風季札自何來  
巍冠峨峨垂緩帶  
龍山虎阜翠煙浮  
曲浦澄江素月流  
唱罷驪歌向人別  
城西一訪謫仙樓

贈秋官葉敬之奏最北上

三年持法白雲司直道人歌張釋之竹簡下帷工舊學  
桃花留縣有餘思每緣正氣瞻台嶽幸接交情老鬢絲  
才俊爾來多近侍看君搖佩入丹墀

贈沈少剛

東浦清清連太湖太湖水光秋可娛美人乘舟明月底  
戲引驪龍出弄珠黃公壚頭沽酒醉一曲吳趨天下無  
請君早出濟黔首歸來東浦隨吾徒

贈胥大夫

洞庭水波混天色君山嵯峨莫江國岳陽樓頭一開眼  
造化高深坐中得紫綬若若方離腰浮生萬事如雲飄  
采服諸郎遞起舞醺醺滿泛黃金瓢醉醒不復問天地  
日倚南窗咏松桂仙老休傳九轉丹大夫自度三千歲  
雛鳳行賀李少宰夢弼生子

雛鳳本出西崑崙百鳥奉之巢帝閣大聲鼓鳴震海水  
羽毛煥爛光朝暉銜書獻瑞降神德門乃為少宰之子

司徒之孫英物生來不嫌晚秀骨墮地人傳喧犀頂雙  
開日月角公侯異種由根源鄴侯萬卷行可展立地便  
見乘華軒家書飛鞚入東省看君黃氣眉稜騫兩鄉競  
作湯餅宴莫惜爛醉雙金樽

相士吳立

希夷漫讓麻衣術禦寇元藏杜德機燕頤紛紛食肉相  
龍門寂寂釣魚磯

贈謝應午

志士抗高節末俗寡所諧出門各有務疇能喻中懷契  
合將焉託睠此庭中槐孰謂爾無心達性乃弗乖榮謝  
委時義強幹屹不摧吾志苟如此何必求形骸

贈馬大承道超貢上禮部

金膏水碧不易得馬生才華傾衆人昂藏場屋每脫畧  
一躍便致青雲身聖朝禮樂復元古隋唐科目安足數  
玉階獨對天人篇舉頭思與夔龍伍鄉國從來盛俊英  
蹇予乖刺老無成拂君寶劒出門去早取千秋萬古名



贈惲司勲器之

干將無留割奇驥刷千里磊落惲司勲天才豁所委研  
精綜天人識微洞玄理排蕩五行家力破管郭壘領郡  
懋循良司農廣儲峙策功龍飛鄉天子知姓氏三命登  
吏曹士類鑑如水古稱裴叔則朗照宛相擬奏績明光  
宮履聲徹階祀留之置左右啓沃自茲始

雲厓

匡廬蒼蒼五老峯彭湖倒蘸青芙蓉峯頭雲氣日五色

散落厓谷生春容子晉吹笙紫宮裏挂笏看雲時隱几  
雲兮雲兮心共閒不逐秋風渡江水

贈黃仲實太常

嘉遜息巖壑朋游寡諧親匪茲慕狷獨動靜理自因同  
人念蓬宇惠然遠來臻契濶既以展觴豆亦間陳冲襟  
共披豁時卉况鮮新神聖恢皇綱朝有明哲臣流惠及  
畝畝粒食終垂綸

贈馬督府

將軍美白皙朗然玉山行曾填六韜書膽氣森縱橫往  
年鎮幽朔軍令肅且明彎弧挿白羽破的矜驍騰設伏  
殺強虜開邊廣屯營犬羊悉敗北咋指逃榛荆太行竟  
為險巖業亘長城千秋屏翰地再見李樂生時平納虎  
竹袖手居留京讀書不出戶緩帶含餘情調笑射楊葉  
猿猱屢號驚雲間鷺鷥羽往往落虛抨把酒登鳳臺北  
望煙雲平醉拔龍劍舞繡澁鬼血青頗聞燕趙士踴躍  
思雄名竭來拜新詔起握南府兵驂騶試按轡無乃枉

其能近者居延塞烽火劇流星天子日側席籌策勞公卿  
君今謁丹陛嵩呼致忠誠何不請長組奮臂抗先旌  
蛇矛耀白雪直擣單于庭丈夫貴許國退遜非豪英子  
儀伏回紇充國制先零豈必待擐甲折衝由先聲畸人  
卧山谷十載懷相傾簪盍雖云樂所希王國寧

於淮水東贈徽守王行之二首

王尊元直道顧凱一狂生邂逅風波地相看義氣傾雲  
消山自得秋近水偏清握手旗亭暮那堪去住情

新安江見底擊楫興如何日轉雙旌影風傳五袴歌名  
高翻借郡道古拙催科此地賢人衆毋辭握髮多

東金許二生下第歸卧病

二仲來疎榻滿塵青青林竹映階新還家頗恨垂高翼  
閉戶應憐養谷神長路風雲難適意故山薇蕨有餘春  
聞君已斷窺園路更註春秋紹獲麟

和羅女文悼妾二首

斗帳紅羅雜組裾陽臺雲散夢無由靈飛月殿仙為侶

鬼落星宮命見仇金屋舊恩何處所銀河秋望此生休  
欲知清夜傷心地畫燭燒殘獨倚樓

水榭花臺失舊蹤新秋風雨罷芙蓉也知尤物終先壞  
恨殺傾城不再逢墮淚難禁團扇賦埋愁空起若堂封  
魂歸莫向家鄉去楚水淮山一萬重

送廣寧伯還京

代人作

江上樓船畫鷁飛波搖采旆光輝功高大室山河誓  
令肅行營虎豹威白露迎寒霑客旆雲開霽引朝衣

獨憐南府多賓從離恨依依望轉迷

贈蔡別駕

復元

蘇臺對酒忽經年淮水論文更別筵  
麗藻流傳都下賦甘棠歌頌召公賢  
宮袍曉濕鍾陵雨官舸秋迴震澤煙  
臺內借籌均二稅願將周禮贊成宣

短歌贈羅女丈二首

鍾山嵯峨入紫冥百靈獻秀開金庭  
大江奔騰龍虎躍千峰散落南天青  
道人築室天印下丘壑重重到茅舍

謝墅花驕羅綺春  
秦淮舟泛星河夜  
人生強健早歸來  
日月持光送酒杯  
麟閣功名有時命  
何須長戀黃金臺  
橋東曳杖隱淪客  
抱琴來尋莫相絕

世路羊腸莽荆棘  
江上漁舟獨瀟灑  
五湖何地非吾家  
相逢並是同心者  
北風起兮雪片飛  
山川搖落鴻鴈饑  
地映吳天白如掃  
唯見松柏青依依  
大魚浪蹙飛不得  
小魚僵死手可拾  
妻孥白飯盡一飽  
豈向朱門乞殘炙  
黃天蕩深萬魚聚  
我與老翁蕩舟去



送楊督府還關中

林塘小隱帝城隅，時枉元戎問腐儒。  
傾蓋交情唯古道，填胷兵甲有陰符。  
廉頗去國仍強健，蕭相成名在轉輸。  
歸去灞陵秋獵晚，莫嗔醉尉夜喧呼。

送彭年

畫舸來自吳江水，皇州踏遍諸名山。  
天門表裏金銀闕，陸海東西虎豹關。  
橫笛正逢秋月滿，題詩渾亂錦苔斑。  
柴門久待嵇康駕，願爾棲遲且勿還。

寄蔡九達

縹緲峰高碧霧重仙人樓閣隱玲瓏  
新文出世諸生法大道行天萬古同  
未見江湖徵李泌每勞卿相問王通  
休誇林屋煙霞勝霖雨蒼生望未窮

寄王履吉

石湖東畔草堂低日日乘舟泛越溪  
鼎轉丹砂驅鶴守匣封雄劍惱鷄啼  
林中餉客蒸黃獨澗下褰裳弄紫霓  
愛爾棣華情不淺詩成強半憶征西

送羅誠甫訪新安王太守

黔江水澄清見底黃山裳發煖薰人京華欲問新安政  
十月聞君踏早春

沈懋學游金陵歸杭

六首

王會車書一統尊神京南北控乾坤長江險作雷霆鬪  
鍾阜高為龍虎蹲

吳越千山斷續青西湖那似大江澄東來歷歷看形勝  
獨見彤雲護紫庭

茱萸錦帶繫吳鉤半醉來登太白樓喚取美人歌白苧  
任教明月下西洲

君到金陵秋氣新紫萸黃菊照江漣  
崔嵬一片龍山石  
又見荆南落帽賓

青山一洗煙華色徐庾空流怨曲長  
才子來觀商邑盛  
却歌殷武頌湯王

詞鋒撇捩鮑參軍畫法侵凌鄭廣文  
長傍牛車歌白石  
空傳鸛侶滿青雲

賦陸如愚白谿上

倒注銀河水潛通石澗泉月寒鋪素練雲淨濯青天照  
影鬚眉見澄心冰玉懸時看氣五色隱隱發龍淵

送王子新游淞川

王生龍鳳姿夙慕嵇阮蹤舉目局四海何心顧樊籠詞  
標文苑秀書擬絕代工端居不出戶華譽溢金鏞浩蕩  
五嶽懷婚嫁猶未終問訊菴畫溪結想三茅峰采芝共  
誰餐石髓或可逢顧予疲繭人枯魚困泥中望望紫煙

駕引領遡長風

送許彥明往松江二首

結友不知心履綦空累百與君山林交心跡兩無隔不  
見輒相思相見終昕夕歲暮誠寡徒繾綣荷三益今晨  
叩蓬戶車馬有行色臣恣山水游亦以衣食役畝田間  
三泖霜落事秋穫言念四體勤顧此十口迫浮生寡懽  
悵玄髮亦已白天寒早返駕勿作久游客

東吳多勝友遠念因君勞累歲不一見每慙平生交扁

舟過蘇臺覽勝虎山橋笠澤控海口登丘望雲濤高詞  
競摘錦古意相投膠水國早寒夜霧盡霜月高清算出  
美酒鱸魚解鸞刀窈窕子夜歌依稀白雲謠因之發幽  
興併令塵慮消

贈汪生然水

愛爾溫如玉丁年即善詩名從三辟重身作五侯師醉  
月淹京國觀濤歷海涯還家事幽討長下讀書帷

題濯足圖壽陳隱翁

尹山山下湖水浮仙人高居湖上頭歲取灌田供薄飯  
時來濯足弄扁舟塵埃濯盡玉體清手攀瓊樹踏雲行  
子孫學文兼學稼咫尺不入夫差城我心愛之恨莫從  
萬籬空思附長松遙持海上千年酒寄向湖東七十峯

贈雪舫君

北風天地肅大雪何繽紛長江夾萬山千里同一雲江  
水東北流素光靄氤氲恍如黃天蕩歷亂鷗鷺羣又如  
海門口白蜺駕龍君道人發高興放舟龍江濱燕磯風



飄飄石帆浪沄沄中流自鼓楫前浦金焦分手持一斗  
酒坐玩波濤文浩歌黃竹篇十斗乃微醺登艫指東海  
蓬閭窮無垠誓把安期袖看曳飛瓊裙迴風却返棹未  
得通殷勤下顧濁世士塵網徒糾紛歸來雪微止西山  
帶殘曛却笑剡溪上杯水安足云

贈朱子价

入洛新傳小陸才通家能為李膺來清風坐發幽蘭詠  
遠興春流曲水杯舊樹閱人經兩世啼鶯向客嚀千迴

翩翩彩鳳雲中翼徙倚高梧病眼開

送王九之入京

澄江館前江水流征帆五月下揚州  
玉京臺省多知己會聽常何薦馬周

贈蘇州教授錢宏甫二首

傳道青鞋入舊京亂山何處覓經行  
因君却夢西湖色一夜垂楊滿目生

蘇湖教法胡安定漢代醇儒董仲舒  
組繡空文麾舊習

虛無高論大新書

書畫上贈總憲王公

煙霞地隔青林遠日月天迴紫殿深  
浮世行藏非二道達人憂樂本同心

陳九臯將游五嶽過余贈詩輒答四韻

白鶴東來毛羽奇翩跹上國振光儀  
雲隨五嶽仙人仗錦爛三都才子辭  
過眼江山皆有色懸壺日月漫無期  
嗟予老病蓬茅下煙水道遙劇夢思

與王佺

長安季主洞幽明市肆談玄折賈生抱病老人茆屋下  
倚風欹枕聽江聲

和答同年朱君佐邦伯二首

四方網紀日夫子耀龍光小試開民社高才失廟廊風  
嚴松力勁草盛豆苗荒耿耿循良傳千秋數趙張

馳驅空病骨偃仰負清朝獨采山中藥期尋海上橋懷  
賢歸水鏡憂國望星杓千里聞金奏泠泠勝九韶

贈王光祿克明遷北寺

燕山控華夏中天開紫京聖皇握宸極萬國朝繁星金  
陵舊豐鎬庶府羅公卿夫子光祿彥雄才能發研討叛  
奮南楚四海馳英名五等未儋爵三命詎為榮密勿紫  
泥詔宵旰側席情簡知由一德而豈資割烹五味濟其  
和雍雍事調羹高爵日以峻泰階行且平山人伏巖谷  
永願歌德聲

贈別張汝益還松江

金陵菊黃酒如乳吳船繫在江亭樹玉尊狼籍猶未收  
浮雲已暗君行處草堂索莫增離愁羨君高義古人流  
緼袍不恥狐貉立千金一諾憐交游愛而不可見去亦  
何時來明來挾策朝天去遲君一醉鳳凰臺

贈鄔戶部佩之入賀元正

魏闕元正會萬方鎬京奉使羨仙郎旌旗過岱衝祥雪  
冠佩朝天近御香龍護袞衣當五位鳳調蒼律應三陽  
兩都擬就張衡賦併獻丹墀薦壽觴

哀歌行弔周封君

君不見太阿錚錚豺虎讐鉛刀繞指矜和柔又不見寒  
松蒼蒼澹無色桃李榮華耀朝日蕪陽封君不可起前  
輩典刑今遂已片言鄉黨倚泰山千金散義如流水蔡  
邕不愧有道碑涇野傾心逸民史嗚呼故老凋喪人則  
哀高門赫赫空成灰

寄壽仲憲長與立

淮南小山真得地洛下耆英最長年入竹琴尊明繡服

倚雲蘭桂布芝田門庭舊訓鄉人法服食奇方海客傳  
後圓種松今已長稱觴應傍老龍邊

寄壽方僉憲時鳴

清朝早脫惠文冠石浦雲濤拂釣竿伯仲大名天下重  
行藏全節古人難居山歲久松鱗老閉戶秋高桂樹團  
青簡丹砂皆長物酒杯花藥足交歡

和女文自壽二首

天印峯頭望太空海天冥漠快高鴻煙霞窟宅將儔侶



玉雪襟懷見始終曳履那需東郭雪枕書長占北窻風  
虛無大藥千年鼎潦倒滄洲一釣翁

風塵無路上漁蓑林壑逍遙樂事多花底笙歌傳酒賦  
水邊臺榭散行窩素心一任浮雲變華髮其如大藥何  
新買小山皆種桂綠陰青子任婆娑

送譚子羽歸真州

鄉國富才英譚生最清發衆中挺眉宇開雲見華月腹  
笥書崢嶸磬折口恒訥賢關三千士讓爾名突兀長江

陽家林定省暫歸謁槐黃赴秋闈一戰建奇伐手持青  
瑤篇騰踏獻金闕

贈斌老

山僧無事睡方濃夜半何人忽打鐘背却松陰還露坐  
月輪高照殿西峯

送徐禹量遊溧陽

寶劍青驪照國門飄飄豪氣識王孫車前掛得椒漿去  
瀨渚先澆烈女墳

贈孫三

江左孫郎義士風，解披心膽結才雄。  
耕田帝力果何有，避地隱淪將爾同。  
淮水晶茫雲霧外，草堂疎散竹林中。  
更憐天印山頭月，長照樽前酒不空。

輓白巖太宰喬公

世業韋門盛，時名魏相優。  
銓曹標宿望，鑰領諸侯廟。  
議山難轉人，才網盡收金。  
天高太華滄海納，羣流國有  
蒼龜在人傳。藻翰道江山，饒賞詠劍履。  
獨行休再擬經

綸起俄成汗漫遊丹青歸大化帷幄罷前籌殄瘁邦家  
卹風猷史閣修舊交紛雨泣異域眇雲愁一奠猶無所  
相知豈盡酬唯應晉川水遙會海東陬

送劉生承恩歸太原秋試

麟角鳳嘴見者奇火齊木難光陸離太原劉生氣殊衆  
年甫二十高名馳韋賢相業更三世戴聖明經傳博士  
白壁風儀不動塵洪鐘扣答如流水寶劒腰懸明月光  
秋闈小捷何足當看拖內殿青絲履笑踏君家白玉堂

白玉堂非難取  
冒中家學貫伊呂  
千秋萬歲奉明主

清曠亭酌酒同許隱君贈別臧子明進士春試

卧病空山孤草亭  
五人高駕扣巖扃  
開樽勝地臨千嶂  
揮麈清風倒六經  
三月杏園看走馬  
幾年書閣照囊螢  
丈夫事業須强健  
羨爾登朝兩鬢青

和趙克用自壽

高人定性謝韋弦  
可怪臨書尚作顛  
白髮交游多後輩  
青山行樂有前緣  
忘機盡散談棋社  
好事仍抄種樹篇

塵海風波終日異醉鄉泉石自年年

壽華母

萊婦仍聞住帝城班姑何必教宮庭家規累世傳為訓  
子姓成行領不名舞鶴自能翻壽曲護花元解散憂情  
瓊筵繡軸尋常事總讓高門孝友聲

壽徐禹量母

綺閣斑衣呈壽酒玉山丹實走仙桃傳詩令子人倫重  
開國元功地望高河鼓雙星爭送巧秋千百索遞分曹

相誇綵線清燈下閒繡宮雲滿素袍

贈仲菴鄔封君

俗士各有營高人澹無欲締構青霞居吟諷紫芝曲境  
空遺安排形忘破羈束莊生賦逍遙老氏捐殆辱杖屨  
金焦峯夢寐江樹綠有子奉滫瀡無煩問餅粟

贈顧生斯道

崑崙鮮頑璞丹穴無凡禽吾宗著東吳挺拔皆秀森羨  
爾甫弱冠器宇遂澄深神駒未展足龍泉斂銀鐔耽玄

託雅志和衆敞虛襟古稱黃叔度汪洋浩無潯若翁信  
不忝克肖生寧馨竭來游建業周覽龍虎岑高歌臨長  
江泠泠有餘音顧我山中居慰意良已深彈琴對秋月  
款語脩竹林明朝動歸櫟遙懸天末心

金元賓自吳赴山中商定王履吉遺藁臨別有贈  
王子不可作遺編重南金珊瑚逸海底鐵網勞行尋元  
賓奮高義搜羅逮幽沈玉札聚緗帙虹光耀詞林玄經  
不覆瓿侯芭名至今完此連城寶重爾傳燈心四海莽



寥濶誰應嗣知音

送吳銑入楚

岳陽樓頭江月輝  
洞庭湖邊燕鴈飛  
秋深獨客興方遠  
天際孤帆風正微  
九日他山茱菊酒  
百年空谷芰荷衣  
武昌沈約多詩興  
聽賦蒹葭贈爾歸

田舍聞柴京兆致仕

卧病空山秋草深  
愁聞京兆謝朝簪  
吾民薄分去慈母  
野老獨吟傷寸心  
茂樹清流從所好  
朱絃瑤瑟有遺音

扁舟東下三江水極目浮雲白日陰

和嚴太宰生日

豐鎬幾年淹吏省虞廷多士望朝衣  
台衡地重公何晚金玉文高世所稀  
共識皇情優且渥莫疑吾道是邪非  
傳聞稷契頻推讓黃閣風清正啓扉

贈陸司諫浚明游金陵還吳

陸子入金陵飄飄若神仙足著遠游履  
高詠名都篇朝攀虎踞石夕弄湯池泉  
窮搜六代跡下拍靈運肩  
它人

安得近相攜唯惠連  
睠余卧江海杖策枉茅簷  
會面驚髮改吐心知性偏  
問渠解綬故舉眼睨青天  
呼酒不停飲竟醉眠花前  
凌晨告别去往就丹陽船  
浩蕩震澤水相望空雲烟

山橋候送王道思

念與高人別郊圻出餞遙  
陽烏先羽節夏葉暗河橋  
鳳起丈堪羨鵬搏勢莫招  
願專鄒魯化終贊聖明朝

壽楊山人

巾舄飄飄山澤臞偶然游戲入皇都  
花前絲竹堪陶寫橘裏碁枰絕叫呼  
舊說登仙多鶴骨誰家生子盡龍駒  
漢廷丞相張蒼老羨爾能傳大藥爐

題印空卷贈楷僧

皎月天空那有影寒潭風動始生鱗  
心從定後離塵劫眼在無中見法身  
可信住山元是幻也知荒殿不須新  
須彌亦合俱推倒臨濟曹溪若個親

贈施子仁入汴二首

君上夷門瞰大河，遶城秋色起洪波。  
梁王賓客知誰在，莫唱蓬池阮籍歌。

熊轡皂蓋大梁游，回首金陵二十秋。  
聞道西關子城下，鴈鴻飛盡水空流。

郊居寄陳九臯

高人棲道院，逸思滿秋山。  
鶴立天壇淨，梧飛露井斑。  
幽探行獨影，麗句動羣顏。  
可信金陵勝，皇居紫翠環。

陸浚明再遊金陵

一片行旌去復來名山千疊繫高懷不辭淮水迎風棹  
要縱秋臺玩月盃李白綺裘人競看謝安歌扇客重開  
雄豪今古知誰識玉笛胡牀漫自哀

贈張濟民

長桑飲上池能見垣一方華陀得神授為人滌肝腸豈  
不絕塵軌終然稱謫狂張生仲景後起自秦越鄉少年  
讀素問淹貫靈樞章執脉炳內照先幾決存亡聲名徹  
四海豈獨傳維揚訪余空山曲相留但壺觴形骸委大

化何心扣災祥唯有好山癖所願足力强囊中有靈藥  
請授一七嘗

送陳九臯還山陰

秦望山人草木衣能令巖壑動光輝  
遠遊吳楚詩名大  
長揖公卿禮數稀  
摩詰風流兼善畫  
嵇康豪宕本忘機  
都門不久留君住  
手把幽蘭賦式微

贈別張槩還真州

長江水如一匹練與子隔江少相見  
春來對酒花滿枝

冬去寒林積冰霰人生萬事在少年功名早奮三才前  
舊穿楊葉有妙手此飛便合冲青天爾不見漢家文學  
稱揚雄晚詆詞賦為雕蟲它時得路展經濟後有韓范  
前夔龍

哀攝泉居士三首

天意真難測仁人竟不延長辭淮水月何賴攝山泉尊  
滿仍餘酒囊空豈剩錢想應生滅際已悟大乘禪

玄度先朝露逢時輒損歡城春花月慘江晚水雲寒苦



調悲隣笛清風憶素冠山南多舊寺那忍過長干  
感激投膠契酸淒屬續言白頭餘積恨黃壤誓酬恩往  
事成今古交情接子孫獨憐孤鳳羽能慰九泉魂

答蔡九遠新春旅懷見投一首

把耒空山學治生雪寒人靜始歸城倏驚江檻新梅色  
猶記春梁乳燕聲過眼歲華添老鬢閉門交態任浮情  
中郎好古翻多事爨下仍聽朽木鳴

壽張時琢

東海翁子也

海翁醇儒冠文藝乃餘事巋然英憲朝海內勤仰企  
天人騎箕歸龍種發神驥伯仲忝周旋晚交屬其季詩  
名動巖壑家難習書字穆穆孝友姿五常白眉異庭階  
衍芝蘭諸孫更嫵媚西來乞我詞獻壽為遙致既驚瑤  
環相益歎箕裘世大德享未終後嗣宜爾熾祝君壽千  
年孫子據高位源源餘慶流乃盡天報意

送楊晉卿赴桐鄉

飄飄黃綬早臨民鄉國高才每羨君官棹近連藩省水

縣齋長對甌山雲蛟龍過物多濡澤奇驥追風自出羣  
世德循良應不忝祇今臺省重求勲

山中集卷三